

# Josef

## Ola pipul bla Ektimat

Storimen

Josef

Jeikob (en sek cloth)

Josef Brajamob

Braja (1)

Braja (2)

Braja /Rubin (3)

Braja/Juda (4)

Benjamin (lilwan braja) (garra silba kup)

En 5 bigwan biginini

Potafa

Potafa Waif

Det King (Fero)

Wekinmen

klebabalamen

Piljamen

Det Bamen

Kemul

# Dei 1

**Storimen:** Wal dijan Baibul stori blanga det yangboi neim Josef. Yu gin faindim dijan stori langa Baibul. La det buk gulum Jinasis la tjepta 37 raidap la 50.

Josef bin oldei lukatambat ola ship en gout blanga im dedi. Imbin abum tenbala bigwan braja brom difrinwan mami. Imbin abum lilwan braja du. Det brajamob bin oldei album im. Jeikob bin laigim Josef mowa langa detlot najalot san blanga im, en imbin meigim purdiwan kout blanga im.

*Dediwan pudum on det kout la Josef.*

LL - Pitja 5

**Josef:** Aibin abum drim. Yumob lisen mi na. Wibin ol wekin langa det pedik kadimbat det longwan gras en wibin gedim bandul en taiyimap en meigim leidan la graun. Mainwan bandul bin jandap streitbala na en ola bandul blanga yumob bin jandap raidaran langa mainwan, en deibin ol baudan langa mainwan.

**Braja 1:** *Yu reken yu garra jidan bos blanga mibala, indit?*

**Storimen:** *Deibin heidim im mowa en mowa. Deibin jidan bedfren langa im detmatj na, dumaji imbin abum det drim.*

**Josef:** *Wal yumob lisen la mi na. Aibin abum najawan drim. Langa det drim aibin luk det san en det mun en lebenbala sta, en deibin ol baudan langa mi.*

*Ola braja bin gitwal.*

**Storimen:**

Bambai na wandeidei ola braja blanga Josef bin deigim ola ship en gout longwei blanga idim gras langa det kantri gulum shekam.

**Jeikob:** Yu gin redi na, bla go en luk ola braja blanga yu.

*Josef wok.*

*Brajamob lukaut bla im kamanap*

Wen olabat bin luk im kaminap longwei langa roud deibin tok miselp bla dum samting langa im.

*Brajamob tok miselp*

**Braja (1):** *Kaman na, wi garra kilim det boi hu oldei abum drim.*

**Braja (2):** *Wi garra binijimap im en tjakam im bodi, langa det draiwan wel en afta wi garra dalim wi deidi wailwan enimul bin idim im.*

**Braja /Rubin (3):** *Wi nomo wandi kilim im ded. Wi jis tjakam im laibala insaid langa det wel deya langa det bush kantri.*

.LL - Pitja 6

**Storimen:** *Bambai Rubin bin jinggabat im garra gobek en larramgo det boi fri en deigim bek im la im dedi. Wen Josef bin kamat langa olabat deibin grebum im, en deibin pulumat det purdiwan kout brom im en deibin tjakam im langa det draiwan wel. Afta dina sambala pipul brom det traib gulum midiyen deibin kamanap garrra kemul. Selibat olkainaba ting. En wanbala braja neim Juda bin tok.*

*Ola braja grebum im brom bak en pulumat det kout en tjakim la det wel.*

**Braja/Juda (4):** *Wotfo wi garra kilim det braja blanga wi en blandim im bodi? Mobeda wi selim im langa dislot pipul. Wi nomo wandi ardim im dumaji im ronwan braja blanga wi. Wi ol wan blad garra wanbala dedi.*

*Deigmat Josef brom det wel en selim im.*

**Storimen:** *Wal deibin kilim wanbala gout, en deibin gedim det kout en sokum langa det blad.*

*Deigim en shoum kout la olabat dedi*

**Braja (2):** *Dedi yu sabi dijan kout weya melabat bin faindim?*

*Meigim miselp nogudbinji wei*

**Jeikob:** *Yuwai, mi sabi orait! Tharran blanga main boi Josef! Wailwan enimul bin kilim en idim im.*

*Stat krai krai bla longwan tiam.  
Breigim Klos en meigim yu luk nogudbinji.*

**Storimen:** Wal wen det olmen Jeikob bin gedim det bednyus, imbin breigim im ronwan klos dumaji imbin nogudbinji, en imbin werrimon sek beigwan klos weya imbin kraikrai nomo lilbit fo longtaim. Wen det Ishmeil pipul bin kamat langa Ijip, deibin selim Josef langa wan men neim Potafa.

*Hendioba Josef la Potafa*

## Dei 2

**Storimen:** Wal Josef bin jidan langa det kantri gulum Ijip na, en Yawei det trubala God nomo bin libum Josef. Imbin oldei deya garram im en imbin oldei album im langa ebrijing weya imbin oldei dumbat. En Josef bin oldei jidan deya langa det haus blanga Potafa det bos blanga im. Bambai na Potafa bin luk Josef bin oldei dum ebrijing brabli gudwei.

Bambai na det waif blanga Potafa bin tjesimbat Josef en imbin askim im blanga slip garram im dumaji Josef bin yangboi wan.

**Josef:** Nomo! Ai kaan dum detkain ting langa main bos.

**Potafa Waif:** Yu Kaman! Yunmi garra slip na!

*Imin grebum im kout.*

**Storimen:** Bambai na wen im hasbin bin kaman det gel bin dalim im det laiyawan wed. Wal det hasbin bla im bin gitwail brabli, en imin jandim wed langa ola blijimen en deibin grebum Josef en pudim im insaid langa det ronwan jeilhaus blanga det King.

*Ola bilijamen deigim Josef la Jeilhaus*

--Stap fo lilibit--

Bambai na du yiya bin gon na, en King Fero bin abum dubala drim. Ailibala na det king gin stat jinggabat en imin jandim wed langa ola dokatabala en langa ola klebalamen ebriweya langa det kantri. Bat dei nomo bin sabi wanim det dubala drim bin tok blanga im.

**Det Bamen:** Tudei na aibin jinggabat det wekinmen brom det Hibru traib bin dalim blanga minbala drim.

**Det King:** Wal go gedim im en bringimap iya langa im streitawei. Josef aibin abum dubala drim bat nobodi sabi det mining blanga det dubala drim. Bat deibin dalim mi yu sabi detkain ting. Dei reken yu sabi wanim eni drim im tok.

**Josef:** Nomo mi nomo sabi! Bat God gin dalim yunmi, wanim det dubala drim tok.

**Det King:** Langa det fes drim aibin jandap wansaid langa det Nail Riba en aibin luk sebenbala brabli fetwan buligi bin kamat brom det riba. Afta na sebenbala brabli skiniwan buligi bin kamat brom det seimwan riba en detlot sebenbala skiniwan buligi bin idim ol detlot sebenbala fetwan buligi bat still deibin jidan skiniwan. Bambang aibin abum najwan drim. Aibin luk sebenbala bigwan daga bin kamat brom wanbala tri. Afta na detlot sebenbala draiwan daga bin idim ol detlot sebenbala bigwan daga.

**Josef:** Det dubala drim garram seimwan wed. God bin dalim yu wanim im garra du. Blendibala daga garra gro ebriweya langa dijan kantri fo sebenbala yiya. Yu lafta pikimat wanbala klebabalamen blanga jidan hed bos blanga dijan kantri en najalot wekinmen blanga hipimap det daga langa stowa haus langa ola taun. If yu dum lagijat ola pipul blanga yu kaan dai blanga daga wen det sebenbala draiwan yiya kaman.

*Afta Josef bin jingabat brabliwei.*

**Det King:** Wi kaan faindim eni gudwan men blanga dijan wek. Oni Josef na dumaji det spirit blanga God im jidan garram im.

*Det King luk la ola men.*

## Dei 3

**Storimen:** Langa det sebenbala gudbala yiya ola pipul bin growimap detmatj daga en deibin hipimap det daga insaid la ola stowa haus langa detlot taun.

Bambai na det sebenbala gudbala yiya weya deibin growimap ola daga bin binij na.

Wal imbin brabli drai langa det kantri weya Jeikob bin jidan.

*Wekinmen en blijimen en Josef la wansaid.*

*Jeikob en im ola san la najasaid.*

**Jeikob:** Wotrong garram yumob? Yumob go langa Ijip en baiyim daga blanga wi bambai wi dai. Benjamin im garra stap garram mi, dumaji im dumatj trabul deya.

*Ola bigwan brajamob bin stat wokawei na la Ijip.*

**Storiman:** Josef imbin det boswan man bla selibat daga la Ijip. Ola braja bla im bin kam en baudan langa im.

*Ola braja garra boudan na.*

ieim laik  
LL - Pitja 5

Josef bin sabi im braja mob, bat dei nomo bin sabi im.

*Josef meigim det feis wailwan en tok rafwei langa olabat.*

**Josef:** Weya yumob kaman brom? Maitbi yumob bin kaman bla fait la mela?

*Braja namba 3 garra sheik, sheik en braidin.*

**Braja no. 3:** Nomo! Mela bin kaman blanga baiyim daga. Melabat ola braja gija brom wan dedi. Bla melabat lilwan braja im la kemp garram mela dedi, en det najawan braja bla melabat maitbi im dedbala na.

**Josef:** Ai nomo bilib langa yu. Maitbi yu toktok trubalawei? Oni wanwei blanga faindaut, ai garra pudum yumob langa jeilhaus. Plitjamen, plitjamen!

LL - Pitja 10

*Plitjamen im pudum ola braja la jeilhaus na.*

**Josef:** Yu!

*Josef poindim la braja namba fo (Simiyan).*

Yu en dislot iya. Ai garra pudum yumob langa jeilhaus. Yumob garra gobek en bringimbek det lilwan braja blanga yumob.

*Braja namba fo (Simiyan) im sidan la jeilhaus en ola najalot gobek la Ijip.*

**Storimen:** Detlot brajamob bin gobek la olabat dedi en deibin askim det dediwani blanga deigimbek Benjamin la Ijip. Det ol men Jeikob bin brabli nogudbinji, bikos imbin olredi lujim im dubala san, Josef en Ruben, en na im nomo wandim lujim Benjamin na.

Wen ola daga bin binji na la det kantri. Bambang deibin gobek la Ijip en deibin deigim Benjamin garram olabat.

*Ola braja garra wok la Josef.*

Josef bin mitap garram olabat igin.

**Josef:** Bla yu dedi im orait?

*Braja mob tok mijamet en baudan la graun lida la Josef.*

**Braja Mob:** Yuwei im rait.  
(Pudim thumb ap)

**Josef:** Dijan na la yumob lilwan braja, indit?

**Benjamin:** Yuwei mi na Benjamin.

**Storiman:** Wen Josef bin luk Benjamin imbin wokawei en kraikrai.

*Tenaraun en krai en wok bek langa ola braja mob.*

**Storimen:** Afta tharran deya Josef bin meigim olabat sidan garram im en idim daga.

Josef bin kauntim olabat den imin shoum olabat weya bla sidan wen deibin sidan bla idim daga imin pudum olabat brom det bigiswan braja to det lilwan braja. Deibin hatjamp. Josef bin gibit olabat ola



gudwan daga bigismob, bat Benjamin imbin abum mowa daga den ola najalot braja.

**Josef:** Filimap ola beig garram ola daga en pudumbek ola mani bla olabat insaid la olabat beig, en pudum main speshalwan kap langa det lilwan braja beig garram im mani.

**Storiman:** Ailibala neksdei ola braja mob bin stat gowei brom deya.

**Josef:** Go bulurum olabat, en askim olabat wotfo deibin stilim main speshalwan silba kap?

**Josef Wekinmen:** Hei yumob! Wotfo yumob bin stilim det silba kap blanga main bos? Yumob garra abum bigis trabul na.

**Braja namba 4:** Wanim? Najing!! Mela nomo bin stilim enijing! Wal if enibodi bin stilim det silba kap im garra dai en mibala najalot garra jidan prisana en wek bla yu.

**Storiman:** Det wekinman bin lukaraun la ola beig en imbin faindim det silba kap la Benjamin beig. Ola brajawan bin brabli nogudbinji.

**Josef:** Wotfo yubin stilim main silba kap? Wen enibodi stilim brom mi, yumob bina sabi ai garra faindat detkain ting.

*Braja namba 3 (Juda) baudan la Josef en tok.*

**Braja namba 3:** Mibala holot garra sidan wekinman bla yu.

**Josef:** Nomo. Oni Benjamin, imbin abum det kap langa im beig. Im garra stap iya en bin main wekinmen. Yumob najalot gobek la kemp.

**Braja Namba 1:** Ledim mi tok plis. Nomo gitwail la mi. Aibin pramis main dedi blanga lukaftum main lilwan braja. Bla im bigiswan braja imbin dai en melabat dedi laigim im lilwan san detmatj. Larram mi deigim im pleis.

**Storimen:** Josef bin dalim im wekinmen mob bla gowei brom det rum, en imbin kraikrai adbala – en ebribodi autsaid bin lisin langa im.

*Josef bin tenaraun en tok la im braja mob.*

**Josef:** Mi na Josef blanga yumob braja. Main dedi im stil laibala? Nomo nogudbiji wanim yubin dum la mi. Yumob nomo bin sendim mi iya, Dedi God bin bringim mi iya lida bla seibum loda pipul, en yumob du.

Yu si, naja faib mowa yiya en stil no daga garra gro. Dedi God bin sendim mi iya blanga hipimap daga wansaid blanga ebriwan bambai wi ol dai.

**Storimen:** Josef bin grabim im lilwan braja, Benjamin adbala en dubala bin krai gija. Josef bin grabim ol lot im braja mob en deibin kraikrai mijamet.

*Det King bin kamat en tok*

**King Fero:** Mi brabli gudbinji yubin faindim yu braja mob!! Josef, yu gedim yu dedi en ola kantriman bla yu en bringimbek olabat iya langa Ijip.

Plitjaman mob! Yumob gedim ola wagen bla gedim ola ebrijing bla olabat.

*Ola braja mob stat wokwok langa Josef.*

**Storiman:** Wen deibin gobek langa olabat kemp deibin dalim olabat dedi ebrijing.

**Ola brjawan:** Dedi!!! Josef im liaibala. Im det haibala hed bos langa Ijip.

**Storimen:** Det dediwan blanga olabat bin hatjamp, im nomo bin bilib langa olabat, bat wen imbin luk detlot wegan imin sabi debin trubala.

**Josef:** Ai garra go luk main san Josef, bifo mi binij.

*Blanga Josef dedi en im braja mob garra go grebum Josef na.*

**Storiman:** Blanga Josef dedi en im braja mob bin album ola kantrimen bla olabat deigim ebrijing langa Ijip. En deibin sidan deya 17 yiya la det Kantri en Josef bin kipum im pramis blanga deigimbek im bodi langa im ronwan kantri.

**Storiman:** Det brajamob bin tok mijamet.

**Brajamob:** “Maitbi Josef stil jinggabat wi blanga det nogudbala ting weya wibin dum langa im bifo. Maitbi im garra peiyimbek wi.”

*(Gedim holot bla jinggabat wanim det nogudbala ting imbin dum bla im).*

*Brajamob ternaraun bla luk la Josef.*

**Braja mob:** “Mibala askim yu blanga larramgo mibala fri brom det nogudbala ting weya mibala bin dum langa yu.”

**Josef:** “Mi nomo God. Yumob kaan bradin langa mi. Ai kaan peiyimbek yumob. <sup>20</sup> Yumob bin wandi ardim mi. Bat God bin tenimran det plen blanga yumob, en imbin yusum det plen blanga yumob gudbalawei. God bin yusum det ting weya yumob bin dum blanga seibum laif blanga loda pipul. <sup>21</sup> Wal yumob kaan bradin. Ai garra lukaftumbat yumob, en ola biginini blanga yumob du.”

**Storimen:** Wal olabat bin jidan gudbinji na, dumaji Josef bin tok gudbalawei langa olabat.

Binij na.